

PROFESSIONAL TALIM TIZIMIDA KRIDIT MODUL TIZIMI VA UNING AFZALLIKLARI

Hamrayeva Sojida Qodirbekovna
Namangan viloyat Yuridik texnikumi,
Yuristlar uchun ingliz tili fani o'qituvchisi

Annotatsiya: Maqolada professional talim tizimida kredit modul tizimi va uning afzalliklari haqida kengroq ma'lumot berilgan.

Kalit so'zlar: Kredit-modul, ta'lim, texnologiyalar, aktivi, mustaqil, dastur, texnologiya, imkoniyat, professor.

Аннотация: В статье представлена более подробная информация о кредитно-модульной системе и ее преимуществах в системе профессионального образования.

Ключевые слова: Кредитный модуль, образование, технология, актив, самостоятельный, программа, технология, возможность, преподаватель.

Abstract: The article provides more detailed information about the credit module system and its advantages in the professional education system.

Key words: Credit module, education, technology, asset, independent, program, technology, opportunity, professor.

Kirish: Bilim va ilmning shakllanishi esa bevosita ta'lim tizimiga borib taqaladi. Ta'lim tizimi samaradorligini o'qituvchi saviyasi, talaba ehtiyoji, o'quv adabiyotlari mazmuni hamda mustaqil ta'limni shakllantirishga qaratilgan infratuzilma bevosita ta'minlab beradi. Demak, ilg'or kadrlarni tayyorlash, ularni mehnat bozori talablariga muvofiq raqobatdoshligini oshirish, ijodiy fikrlaydigan mutaxassislarni yetishtirish o'quv dargohlarida yo'lga qo'yilgan ta'lim berish jarayoni bilan chambarchas bog'liq.

Asosiy qism: Kredit-modul tizimi, bu — ta'limni tashkil etish jarayoni bo'lib, o'qitishning modul texnologiyalari jamlamasi va kredit o'lchovi asosida baholash modeli hisoblanadi. Uni bir butunlikda olib borish serqirra hamda murakkab tizimli jarayondir. Kredit-modul tamoyilida ikkita asosiy masalaga ahamiyat beriladi: talabalarning mustaqil ishlashini ta'minlash; talabalar bilimini reyting asosida baholash.

Kredit-modul tizimining asosiy vazifalari sifatida quyidagilar e'tirof etiladi:

- o'quv jarayonlarini modul asosida tashkil qilish;
- bitta fan, kurs (kredit)ning qiymatini aniqlash;
- talabalar bilimini reyting bali asosida baholash;
- talabalarga o'zlarining o'quv rejalarini individual tarzda tuzishlariga imkon yaratish;

- ta’lim jarayonida mustaqil ta’lim olishning ulushini oshirish;
- ta’lim dasturlarining qulayligi va mehnat bozorida mutaxassisga qo’yilgan talabdan kelib chiqib o’zgartirish mumkinligi.

Yuqoridagilar dars mashg’ulotlarini nafaqat o’qitishni innovatsion ta’lim texnologiyalari asosida olib borish, balki talabdan mustaqil o’qib-o’rganish, ta’limga yangicha munosabatda bo’lish, mehnat bozori talabidan kelib chiqib, zaruriy va chuqur nazariy bilimlarni egallash, amaliy ko’nikmalarini shakllantirishga o’rgatishdan iboratdir. Muxtasar aytganda, mazkur tizim talabning kasbiy rivojlanishi va kamolotiga yo’naltirilgan. Ilm sohibining butun hayoti davomida bilim olishini ta’minlashga hamda mehnat bozori va zamonaviy talablarga javob bera oladigan inson kapitalini shakllantirishga qaratilgandir. Keling, shu o’rinda modul va kredit tushunchalari mohiyatiga qisqacha to’xtalib o’tamiz.

Modul — bu, bir nechta fan hamda kurslar o’rganiladigan o’quv rejasining bir qismi. U talabalarda ma’lum bir bilim va ko’nikma hosil qilish, tahliliy-mantiqiy mushohada yuritish salohiyatiga ega bo’lishiga qaratilgan bir nechta fanlar (kurslar) majmui hisoblanadi. Bunda o’qituvchi o’quv jarayonini tashkil qiladi, jonli, video hamda audio ma’ruzalar o’qiydi, talabning faoliyatini muvofiqlashtiradi va nazorat qiladi. Talaba esa mavzuni mustaqil o’rganadi hamda berilgan topshiriqlarni bajaradi.

Xorijiy tajribaga ko’ra, kredit-modul tizimida o’quv jarayoni har semestrda 2 — 4 tagacha moduldan iborat bo’ladi. Modulda jamlangan fanlar osondan murakkablik sari, nazariy-uslubiy fanlardan amaliy fanlarga qarab hamda mantiqiy jihatdan bir-birini o’zaro uzviy to’ldirish prinsipi asosida shakllantiriladi. Talaba mutaxassis bo’lib shakllanishi uchun nafaqat axborotlar, balki ularni qayta ishlash, amaliyotga joriy qila olish malakasiga ega bo’lishi talab etiladi.

Modulga asoslangan o’quv dasturlari maxsus sxema asosida ishlab chiqiladi va quyidagilarni o’z ichiga qamrab oladi:

- o’quv maqsadi hamda vazifalarning to’liq ochib berilishi;
- talabning fanni (kursni) boshlashi va tugatishidan keyingi orttirishi lozim bo’ladigan malakasiga qo’yiladigan talablar;
- modul tarkibiga kirgan har bir fanning qisqacha mazmuni (sillabus), ya’ni ma’ruzalar mavzulari, seminar va amaliy mashg’ulotlarning rejasi, mustaqil ta’limni baholash uchun mo’ljallangan topshiriqlar;
- o’qitishning qisqacha bayoni: ta’lim berish usul hamda vositalari; bilimlarni baholashning usul va shakllaridan iborat.

Modul asosida o’qitish tizimida talabalar bilimi, malakasi hamda ko’nikmasini baholashda reyting baholash tizimidan foydalaniladi. Unda talabning barcha o’quv

faoliyati, ya’ni auditoriya va auditoriyadan tashqarida olgan, o‘zlashtirgan bilimlari ball berish orqali baholanadi.

Kredit (credit) — talabaning alohida ta’lim yo‘nalishi yoki dasturi (kurs) bo‘yicha fanlarni o‘qib o‘rganishi va o‘zlashtirishi uchun sarflangan o‘quv yuklamasining (vaqtning) o‘lchov birligidir. Kredit — talabaning me’yoriy hujjat bilan belgilangan, odatda bir hafta davomida auditoriyada va mustaqil ravishda ta’lim olishi uchun ajratilgan minimal vaqt o‘lchovidir. Talabaga kredit ma’lum bir fandan belgilangan topshiriqlarni bajarib, yakuniy imtihondan muvaffaqiyatli o‘tgandan so‘ng beriladi.

Har bir talaba kelajakda tanlagan yo‘nalishi va mutaxassisligi bo‘yicha diplomga ega bo‘lishi uchun kreditlarni yig‘ib borishi lozim. To‘plangan kredit talabaga butun umr davomida o‘zining malakasini oshirib borish yoki qo‘shimcha oliy ma’lumot olishiga xizmat qilib boraveradi. Iqtisodiy tilda aytganda, to‘plangan kredit talabaning akademik “aktivi”ga aylanib boradi. Kredit texnologiyasi ta’lim oluvchilarga ishchi o‘quv rejaga kiritilgan tanlov fanlarini tanlash, bu orqali individual o‘quv rejasini shakllantirishda bevosita ishtirok etish huquqini beradi. Ularga, nafaqat fanlarni, balki professor-o‘qituvchilarni ham tanlash erkinligi beriladi. Talabalarga fanlarni tanlash imkoniyatining berilishi ijobiy hol sanaladi. Bu o‘quv jarayonlarini baholashning o‘ziga xos qiymat ko‘rsatkichi bo‘lib ham hisoblanadi.

Foydalanilgan adabiyotlar.

1. O‘zbekiston Respublikasi Prezidentining 2019 yil 8 oktabrdagi "O‘zbekiston Respublikasi oliy ta’lim tizimini 2030-yilgacha rivojlantirish konsepsiyasini tasdiqlash to‘g‘risida"gi PF-5847-son Farmoni.

2. Usmonov B.Sh., Xabibullaev R.A. Oliy o‘quv yurtlarida o‘quv jarayonini kredit-modul tizimida tashkil qilish. O‘quv qo‘llanma. Toshkent, TKTI, 2020.

3. O‘rinov V. O‘zbekiston Respublikasi oliy ta’lim muassasalarida ECTS kredit-modul tizimi: asosiy tushunchalar va qoidalar. O‘quv qo‘llanma. Nyu Bransvik Universiteti, 2020 y

4. O‘zbekiston Respublikasi Vazirlar Mahkamasining «<Muhammad al-Xorazmiy nomidagi Toshkent axborot texnologiyalari universitetida kadrlar tayyorlash tizimini tubdan takomillashtirish va samaradorligini oshirish chora-tadbirlari to‘g‘risida» 2018 yil 24 iyuldagi 569-son Qarori.